

UVODNA RIJEČ

Budući da je kod nas u posljednje vrijeme osjetno aktualizirana problematika vezana za konstituisanje i razvoj standardnoga jezika, a budući da u nas postoji veći broj poslenika lingvističkih kojima je ona preokupacijom, — odlučili smo pokrenuti tromjesečno glasilo, KNJIŽEVNI JEZIK, u kojem bi bila tretirana pitanja iz ovih triju osnovnih tematskih oblasti:

- a) teorija nastanka, razvoja i suštine standardnih jezika;
- b) problemi standardnog jezika u serbokroatistici; i
- c) historijski aspekti našega današnjeg književnog jezika.

Časopisu je dat naslov KNJIŽEVNI JEZIK a ne STANDARDNI JEZIK iz dva osnovna razloga: 1) želimo očuvati vezu s pozitivnim tekovinama ranije publikacije u našoj Republici: s PITANJIMA SAVREMENOG KNJIŽEVNOG JEZIKA, i 2) ovaj drugi naslov bi isuviše specificirao tematski krug glasila i onemogućio za nas važan podnaslov: *časopis za jezička pitanja*, koji uglavnom pokriva gotovo sve značajne lingvističke oblasti. Tako pored već navedenih rubrika moguće su rubrike za domaće i prevedeni lingvistički esej, za probleme standardnoga jezika u različitim funkcijama, pa tako i u poetskoj funkciji, za praćenje i ocjenu značajnih domaćih i stranih lingvističkih izdanja, kao i za probleme jezika u nastavi.

Časopis bi dakle mogao da ispunjava i ulogu univerzalnog lingvističkog glasila i da okupi jezičke stručnjake različitih profila. Nadamo se ostvarenju naših zamisli i plodnoj saradnji.

REDAKCIJA